

Headlines

- प्रधानमंत्री नरेन्द्र मोदी होरें नोजवानें लेई 62 हजार करोड़ रपे कोला बी मती लागत आहिलियें बक्ख-बक्ख पैहलकदमियें दी शुरुआत कीती, जिन्दे नै देसै च शिक्षा हुनर ते उद्यमिता गी बड़ा मता बढ़ावा थोग।
- जल शक्ति मंत्री जावेद राणा होरें पुंछ जिले च मेढरी नाले तोड़ी जाने आहली सिङ्कें दा नींह पत्थर रखेया।
- श्रीनगर पुलसै इक घोषत आतंकवादी दी 2 करोड़ रपे मुल्ल दी सम्पत्ति कुर्क करी लैती ऐ।
- जम्मू-कश्मीर स्कूली शिक्षा बोर्ड नै 3 नवम्बर गी शुरु होआ रदे 10मी जमात दे म्तेहानें दी डेटशीट जारी कीती। स्लेबस च 15 प्रतिशत दी कटोती कीती गेई।
- जम्मू-कश्मीर सरकारै केंई थाहरें खराब मीट दी बरामदगी दे बाद पूरे केन्द्र शासत प्रदेश च असुरक्षत जमाइयै रखे गेदे मीट दी बिक्री ते जमा रखने पर रोक लाई दिती ऐ।

<><><><><><>

PM- Koushal Dikshant

प्रधानमंत्री नरेन्द्र मोदी होरें अज्ज नौजवानें लेई 62 हजार करोड़ रपे कोला बी मती दी लागत आहलियें बक्ख-बक्ख पैहलकदमियें दी शुरुआत कीती, जिन्दे नै देसै च शिक्षा, हुनर ते उद्यमिता गी बढ़ावा थोग। नमीं दिल्ली दे विज्ञान भवन च आयोजित कौशल दीक्षांत समारोह च प्रधानमंत्री होरें उद्योगें-कारखानें सरबन्धी सिखलाई देने आहले संस्थानें ITI। राएं प्रधानमंत्री कौशल ते रोजगार परिवर्तन “पी.एम सेतु” पैहल दी शुरुआत कीती। इस मौके पर किटठै गी सम्बोधित करदे होई प्रधानमंत्री होरें आखेया जे कोई बी हुनर राष्ट्र दे निर्माण ते विकास च महत्वपूर्ण भूमिका ते योगदान दिंदा ऐ। उनें दस्सेया जे सरकार युवा पीढ़ी गी हुनरमंद बनाइयै उनेंगी भविष्य लेई तयार करा रदी ऐ तां जे स्थाई युवा शक्ति नमियें काहड़ें ते हुनरें कन्नै पूरी चाली लैस होन।

<><><><><><>

Rana- Roads

जलशक्ति मैहकमे दे मंत्री जावेद अहमद राणा होरें अज्ज पुंछ जिले दे मेंढरी नाले पुलै तोड़ी जाने आहलियें सिड़कें दा नींह पत्थर रखेया जेहदे पर 3 करोड़ 39 लख 20 हजार रपे दी लागत दा अंदाजा ऐ ते इनें कम्में गी सिड़कें, ईमारतें सरबंधि मैहकमें आसेया तोड़ चाढेया जाहगा। इस मौके मंत्री होरें सिड़कें, ईमारतें दे एक्स.इ.एन गी निर्देश दिता जे ओ इस गल्लै गी यकीनी बनान ते इनें कम्में गी तेजिया कन्नै तोड़ चाढेया जा तां जे इंदा मित्थे गेदे समें दे अंदर-अंदर मुकम्मल होना यकीनी बनी सकै ते इन्दे पर कोई बादू खर्चा नैई पवै ते नां गै समें-सिर मुकम्मल नैई होने दी सूरतै च एहदे लेई होर बादू समां मंगना पवै।

<><><><><><>

Property Attached

श्रीनगर पुलस नै रोज एवैन्यू HMT च 15 मरले जमीन पर बने दे त्रै मंजिला रिहायशी मकान गी कुर्क करी लैता ऐ। ए मकान नामज़द आतंकवादी –सज्जाद अहमद शेख उर्फ सज्जाद गुल दे पिता दा ऐ। इक ब्यान च पुलस प्रवक्ता नै आखेया ऐ जे इस मकान दी कीमत अंदाजन 2 करोड़ रुपए ऐ ते गुलाम महोम्मद शेख वल्द ख्वाजा अन्वर शेख दे नां ऐ, जेड़े के नामज़द आतंकवादी सज्जाद अहमद शेख उर्फ सज्जाद गुल दे पिता ना। ए जानकारी राजस्व रिकार्ड ते तहसीलदार शलटेंग श्रीनगर तरफा दिती गई ऐ। ए कुर्की धारा 13, 38, 20 UAPA ते EIMCO तैहत पुलस स्टेशन पारीमपोरा च दर्ज FIR नम्बर 235/2022 दे सरबंघ च किती गई।

<><><><><><>

SASB Donation

3 हजार 880 मीटर दी ऊंचाई पर स्थित अमरनाथ दी पवित्र गुफा च आने आलें श्रद्धालुएं दी तरफा चढतल च कोरोना महामारी मगरा 100 गुणा बाढ़ा होआ ऐ। जम्मू दे RTI कार्यकर्ता रमन कुमार शर्मा दी तरफा दायर RTI दे परते च श्री अमरनाथ जी श्राइन बोर्ड नै जानकारी जारी कीती ऐ। 2020-21 च चढतल सिर्फ 9 लख 23 हजार ही, जेड़ी जे 2025-26 च 9 करोड़ 75 लख होई। सभ्भनें शा मती चढतल 2024-25 च 11 करोड़ 58 लख रेही।

Health Advisory

केन्द्री सेहत ते परिवार कल्याम मंत्रालय नै सब्भनें राज्यें ते केन्द्र शासित प्रदेशें गी सलाह जारी कीती ऐ जे बच्चें च खंगू दी पीने आहली दोआइयें दा इस्तेमाल तरीके ते सलीके सिर कीता जाना यकीनी बनान तां जे मरीजें दी सुरक्षा यकीनी बनाने दे कन्नो-कन्नी इंदे गलत इस्तेमाल पर बी रोक लग्गी सकै। इक अधिकारिक संदेश दे मताबक सेहत सेवाएं सरबन्धि महानिदेशक होरें आखेया ऐ जे बच्चें च आम तौरा पर निक्की-मुट्टी दी शकैत थोड़ी चिरे लेई गै रौहदी ऐ ते एहदे लेई दोआई लैने दी बी लोड़ नैई पौंदी। उनें आखेया जे आम ठंड, जकाम ते खंग लेई दंऊ बरे कोला हेठली उम्री दे बच्चें गी दोआई भलेयां नैई दिती जानी लोड़चदी, उआं ते 5एं बरे तोड़ी दी उम्री तगर बी एहदे लेई दोआई लैने दी कोई लोड़ नैई हुंदी ते नां गै एहदी सफारश कीती जन्दी ऐ।

<><><><><><>

Addl Charge

उपराज्यपाल मनोज सिन्हा होरें IAS शैलेन्द्र कुमार होरें गी बिजली विकास विभाग दे प्रशासनिक सचिव दी अतिरिक्त जिम्मेवारी सौंपी ऐ। उपराज्यपाल मनोज सिन्हा उन्दे निर्देश मुताबक GAD –JK तरफा जारी इक आदेश तैहत वित्तिय आयुक्त, अतिरिक्त मुख् सचिव, राई-बाई विभाग- श्री शैलैन्द्र कुमार होर अगले आदेश आले तोड़ी बिजली विकास विभाग दे प्रशासनिक सचिव दा अतिरिक्त पदभार साम्भगंन।

<><><><><><>

JKBOSE Exam

जम्मू-कश्मीर स्कूली शिक्षा बोर्ड JKBOSE नै जमात 10मीं दा सालाना इम्तेहानें दी डेटशीट जारी कीती ऐ। ए डेटशीट अक्तूबर-नवम्बर सत्र सरबन्धी ऐ। 3 नवम्बर थमां शुरु होआ रदे इम्तेहानें दा समें सवेरें 11 बजे थमां दपैहरी 2 बजे तोड़ी ऐ। कश्मीर संभाग, जम्मू संभाग दे विंटर जोन क्षेत्रें जिन्दे च लद्दाख दे छात्र बी शामिल न, थमां कुल 95 हजार छात्र इस इम्तेहान च शामिल होगंन। 27 नवम्बर गी इम्तेहान खत्म होई जागंन। शैक्षणिक सत्र च खरी मती गर्मी, भारी बरखें, बढ़ल फटने ते हाड़ जने हालातें कारण होए दे नुक्सान गी दिक्खदे होई JKBOSE नै सलेबस च 15 फिसदी दी छूट दिती ऐ ते 85 फिसदी अंक लैने आलें गी 100 फीसदी अंक दिते जागंन।

Frozen Meat Banned

जम्मू-कश्मीर सरकार नै जमे दे ते ठंडे मांस उत्पादें दे उत्पादन, भंडारण परिवहन, वितरण ते बिक्री पर रोक लाई दिती ऐ जेड़े जे खाद्य सुरक्षा ते मानक अधिनियम 2006 दे तैहत वैधानिक सुरक्षा ते लेबलिंग मानके गी पूरा करने च विफल होन। खाद्य सुरक्षा आयुक्त, जम्मू-कश्मीर, स्मिता सेठी होरें सरबन्धत विभाग दी तरफा कीते गेदे निरीक्षण दा संज्ञान लैता जेदे च औषधि ते खाद्य नियंत्रण संगठन दी खाद्य सुरक्षा ईकाई नै खराब, सड़े दे बगैर लेबल दे मीट उत्पादें गी जब्त करियै नष्ट किता गया।

<><><><><><>

GST -Goods Vehicles

तार्किक ते परिवहन क्षेत्र गी मती राहत दिंदे होई सरकार नै कमर्शियल चीजें दी जियां गड्डियां, ट्रक ते डिलीवरी वैनें पर टैक्स दर घटाई दिती ऐ। GST दर 28 फिसदी थमां घटाइयै 18 फिसदी करी दिती गई ऐ तां जे लोकें ते दर्मयाने गड्डी चालकें गी लाह पुज्जे ते पूरे देश च चीजें दी आपूर्ति गी बाद्दा थोए। एदे कन्नै गै GST घट्ट होने करी ट्रकें दी कीमत बी घट्टी ऐ ते प्रति टन किलोमीटर साहबै ढोआई दी किमत च कमी आई ऐ। इस पैहल कन्नै देश च आपूर्ति दी प्रणाली मजबूत होग ते निर्यात सरबन्धी बेहतरी औगा।

<><><><><><>

Cricket Test

क्रिकेट च भारत नै वैस्ट इंडीज गी इक पारी ते 140 रन्जे कन्नै पैहले टेस्ट मैच च हराया। ए मैच अज्ज नरेन्द्र मोदी स्टेडियम, अहमदाबाद च होआ। भारत नै 2 मैचें दी श्रृंखला च 1-0 दी बढ़त हासल करी लैती ऐ। परौहनी टीम गी 162 रन्ज पर आउट करियै, भारत नै 448 रन्जे पर अपनी पारी दी समाप्ति दी घोषणा करी दिती। वैस्ट इंडीज नै दुई पारी च बी अच्छा प्रदर्शन नेंई किता ते 146 रन्ज गै बनाई सकी। भारत दे गेंदबाजें महोम्मद सिराज ते रविन्द्र जड़ेजा नै बेहतरीन प्रदर्शन कीता। वैस्ट इंडीज पर लगातार बनाए गेदे दबाव दे चलदे त्रीए रोज भारत गी जित्त हासल होई गई ते जड़ेजा गी “मैन ऑफ द मैच” घोषिता कीता गया।

<><><><><><>

ODI Team- BCCI

भारतीय क्रिकेट कंट्रोल बोर्ड BCCI नै आस्ट्रेलिया दौरे लेई भारतीय टीम दा ऐलान करी दिता ऐ। इस दौरे दरान सीमित ओवरें आहले मकाबले होगन जेहदे लेई शुभमन गिल गी इक रोजा टीम दी कप्तानी सोपी गई ऐ, जिसलै के रोहित शर्मा ते विराट कोहली बतौर खडारी टीम च शामिल होगन। इसै चाली दौरे दरान टी-20 टीम दे कप्तान सूर्यकुमार यादव होगन भारतीय टीम गी आस्ट्रेलिया दौरे पर 19 अक्तूबर, 25 अक्तूबर त्रै वन-डे मकाबलें दी श्रृंखला खेडनी ऐ जिसलै कि 29 अक्तूबर कोला 8 नवम्बर बश्कार 5 टी-20 मकाबले होगन। शुभमन गिल पैहली बारी इक रोजा मैचे दी श्रृंखला दी कप्तानी करंगन। टीम च श्रेयर अय्यर उपकप्तान होगन ते के.एल राहुल विकेट कीपर। उन्दे इलावा अक्षर पटेल, नितिश कुमार रेड्डी, वाशिंगटन सुन्दर, कुलदीप यादव, हार्षित राणा, मोहम्मद सिराज, अर्षदीप सिंह प्रसिद्ध कृष्णा, ध्रुव जुरेल ते यशस्वी जैसवाल बी भारतीय टीम दा हिस्सा न।

<><><><><><>